

MAJLIS APRESIASI KECEMERLANGAN ATLET UPM

Pada 12 Januari 2019 telah berlangsung Majlis Apresiasi Kecemerlangan Atlet bagi meraikan kejayaan atlet UPM yang telah menyumbang kejayaan buat kontinjen Universiti Malaysia di kejohanan Sukan Universiti Asean, Myanmar 2018 dan Kejohanan Hoki Piala Dunia 2018, India. Majlis tersebut telah berlangsung di Blok MSN, Kolej Keenam UPM yang dihadiri oleh semua atlet dan jurulatih yang terlibat dalam kedua-dua kejohanan tersebut. Majlis ini telah dihadiri oleh YBhg. Prof. Datin Paduka Dato' Dr. Aini Ideris, Naib Canselor UPM dan YBhg. Prof. Dr. Mohd Roslan Sulaiman, Timbalan Naib Canselor Hal Ehwal Pelajar dan Alumni UPM. Seramai 52 orang atlet UPM telah diraikan dan pemberian insentif telah diagihkan kepada semua atlet mengikut pencapaian sukan masing-masing. Perenang negara, Welson Sim Wee Sheng muncul sebagai atlet yang paling cemerlang apabila merangkul 5 emas, 1 perak, dan 1 gangsa di kejohanan Sukan Universiti Asean yang lalu.



KEJOHANAN JEMPUTAN ANTARABANGSA

Pasukan Ragbi UPM Serdang Angels dengan kekuatan seramai 12 orang atlet dan 3 orang pegawai telah meyertai *CJCU 7's Rugby Invitational Tournament* yang telah berlangsung di Kaohsiung, Taiwan pada 17-27 Januari 2019. Di kesempatan itu juga, pasukan Ragbi UPM Serdang Angels telah mengadakan program lawatan di universiti tersebut dengan agenda pertukaran maklumat tempat pengajian serta perkongsian tentang sukan Ragbi di kedua-dua universiti yang terlibat. Pasukan UPM Serdang Angels telah dinobatkan sebagai Naib Johan dalam kejohanan tersebut.



KEJOHANAN SUKAN INTER ASASI 2019

Kontinjen Asasi UPM telah menyertai Kejohanan Inter Asasi yang telah diadakan pada 23 hingga 26 Januari 2019 bertempat di Universiti Sultan Zainal Abidin (UniSZA) dan Universiti Malaysia Terengganu (UMT). Antara acara sukan yang dipertandingkan dalam kejohanan tersebut ialah Bola Sepak, Bola Jaring, Badminton, Petanque, Renang, Catur dan Fun Run. Sebanyak 12 kontinjen menyertai kejohanan ini termasuk Majlis Sukan Matrikulasi dan Asasi IPTA seluruh Malaysia. Kontinjen UPM telah berjaya membawa pulang 3 pingat emas, 3 pingat perak dan 3 pingat gangsa sekaligus menempatkan UPM di tangga ketiga keseluruhan pada temasya kejohanan sukan tersebut.



ATLET RENANG UPM HARUMKAN NAMA NEGARA

Welson Sim Wee Sheng, telah memenangi pingat emas dalam acara 400m Lelaki Gaya Bebas di Kejohanan 2019 *Victoria Open Swimming Championship* yang berlangsung di Melbourne, Australia pada 15 - 17 Februari 2019. Untuk rekod, Welson Sim telah berjaya menewaskan juara Olimpik, Mack Horton untuk memenangi pingat emas dalam kejohanan tersebut.



ATLET HOKI UPM DINOBATKAN SEBAGAI ANUGERAH OLAHRAGAWATI HARAPAN JOHOR



Pemain Hoki Wanita UPM, Hanis Nadiah Onn telah mengetepikan calon lain untuk memenangi Anugerah Olahragawati Harapan Johor sempena Majlis Anugerah Sukan Negeri Johor 2018 yang diadakan di Johor Baharu pada 27 Januari 2019. Kejayaan Hanis memenangi anugerah tersebut adalah berdasarkan prestasi cemerlang beliau dalam penampilan bersama pasukan Hoki Wanita di peringkat kebangsaan dan antarabangsa.



UPM SERDANG ANGELS MEMULAKAN KEMPEN LIGA RAGBI MALAYSIA 2019

Kejohanan Liga Ragbi Malaysia Divisyen Premier telah bermula pada 16 Februari 2019 yang melibatkan sebanyak 8 pasukan terbaik di Malaysia. Perlawanan minggu pertama liga telah menyaksikan UPM Serdang Angels bertemu juara bertahan, Keris Conlay yang berkesudahan pasukan UPM Serdang Angels tewas dengan mata 38 – 24. Pada minggu kedua liga, pasukan UPM Serdang Angels telah mengalahkan pasukan SSTMI Tsunami dengan mata 46 berbalas 30. Kesemua perlawanan berlangsung di Padang Ragbi A, UPM Serdang. Kejohanan Liga Ragbi Malaysia ini akan menamatkan saingan pada 24hb Mac 2019.



KTDI JUARA BAHARU ACARA BOLA JARING KEJOHANAN SUKAN KOLEJ UPM SESI 2018/2019

Pasukan Bola Jaring Kolej Tun Dr. Ismail (KTDI) mempamerkan aksi cemerlang sekaligus telah berjaya mencipta sejarah tersendiri apabila muncul sebagai Juara baharu bagi acara Bola Jaring Kejohanan Sukan Kolej UPM sesi 2018/2019. Perlawanan akhir telah berlangsung pada 22 Februari 2019 di Dewan Serbaguna Pusat Sukan UPM telah menyaksikan pasukan KTDI mengalahkan pasukan Bola Jaring Kolej Tujuhbelas dengan skor 17-16.



PENGANJURAN KURSUS DAN BENGKEL SUKAN BAGI BULAN JANUARI DAN FEBRUARI 2019

Bil.	Program	Tarikh	Tempat
1.	Kursus Kejurulatihan Olahraga Tahap 1	23 Januari - 3 Februari 2019	Stadium UPM
2.	Bengkel KPI dan Hala Tuju PKS UPM	25 - 27 Januari 2019	Hotel Seri Costa, Melaka
3.	Bengkel Pemurnian Kemahiran Sepak Takraw Berprestasi Tinggi	12 - 13 Februari 2019	Universiti Putra Malaysia